

四庫全書

集部

欽定四庫全書

桐江續集卷二十四

元方回撰

戊戌元日三首

班春踰半月獻歲換新正  
馬動人聲喜星明曉意晴  
寒祛和氣勝病愈老身輕  
七十二年事沉吟暗自驚

爐香禮天地再過古來稀  
此日仍逢節何時定許歸  
年高還拜怯客窘久留非  
遙憶小兒女新春只故衣

髣髴曉鐘鳴家家起五更  
物宜春後暖人喜歲初晴  
衰

老猶能飲虛空誤得名題詩思舊日無此好新正

誰識

梅花香未已早是杏花時身老春遊倦心恬夜夢知百  
杯聖俞酒萬首放翁詩肉眼今誰識神仙世有之

不恨

鼓腹千年有平心一物無粗能全晚節不敢恨窮途豈  
少真君子何求老腐儒春風香百草千丈古松枯

題丁適之菊莊

令威舊主芙蓉城上帝謂此職未清救賜別業非菽粟  
屈餐陶採餘秋英蒔庄先生拜新號掌管黃花躬播耕  
莊田莊屋幾頃畝莊官莊佃無姓名只如天隨自荷鋤  
兼味佐以仙犬精乃饌乃糧不過許春苗夏葉俱可烹  
木蘭墜露滋上池亦復樽酒東籬傾人愛熱官我寧冷  
粗有菊譜傳諸生南陽月輸三十斛汝真糞土之朝榮

送林學正愛梅二首

早與梅花歃血盟歲寒同社保幽貞八詩共識林和靖

一賦誰知宋廣平邂逅老夫傳此本慙慙今日送君行  
開元宰相和羹事鐵石心腸待晚成

平生自號愛梅人家住江南野水濱屋角暫辭千樹雪  
馬頭猶帶一枝春馨香事業終須在酸苦工夫盍少伸  
莫學君家舊處士西湖空老太平身

送邱子正以能書入都併呈徐容齋閻靖軒盧處  
道集賢翰林三學士

君不見古來九關虎豹守入仕艱難無不有與能一札

秋槐黃芒鞋布裙天下走攀援龍鱗萬萬手咳唾驪珠  
萬萬口蓬萊無路弱水隔七上十上空白首邂逅登名  
豈不偶選坑沉淪十八九光範三書徒爾忙子公一紙  
馬所取書生身體縱著翅飛聲未辨廷臣右還知氣至  
天地春花者必花柳必柳中庸末章八引詩三詩首言  
士所為衣錦尚絅潛雖伏屋漏不高天聽卑至隱至微  
至顯見鬼神森列何可欺斗間有氣射古劍石上無根  
生瑞芝快雨乍晴虹霓起蟄蟲欲振雷霆馳靜中根本

動中發閤處精神明處知楔帖昔秘永禪師不過紙上  
王羲之御史蕭翼百計取公等乃有胸中奇胸中奇者  
五色筆可以補天可活國宗彝作繪袞作火可但能書  
梵王譯此之所寶玉非石求而不藏卞和泣良賈韞匱  
什其襲藏而不求價倍百公等翰墨今第一誰云識字  
不得力借逕文藝以致身勲名政要無心得九萬里迅  
扶搖風今日朝廷貞觀同聯翩房杜肩王魏試代常何  
草封事

送趙子昂提調寫金經

青藜夜照玉堂直外補已至二千石不合自以藝能累  
天下善書今第一魏晉力命王略帖摹臨有過無不及  
真行草外工篆隸兼有與可伯時癖小者士庶携卷軸  
大者王侯擲縑帛門前踏斷鐵門限苦向王孫覓真迹  
有時乘興掃龍蛇圖畫紙素動成疋有時厭俗三歎息  
何乃以此為人役如池如溝棄殘墨如冢如陵堆敗筆  
太湖西畔松雪齋七絃風清碧山碧桃花水肥釣鰕魚



春雨春風一蓑笠胡為捨此復塵埃鳴鞭更上金臺驛  
白馬四十二章來一大藏今五千帙訂訛補譌重繕寫  
金字琅函較甲乙考工記屬冬官卿潤文使專宰相職  
北門學士董此事一儒迴勝緇輩百精神如玉鬚如漆  
天上知己密如櫛省臺要官俱可得還自管城子中出  
右軍寫經博白鵝孰與明時見數多

送鄧善之提調寫金經

二三十載鄉閭師黃紙初除專講帷溧陽雖小亦新郡

學廩粗足晨昏炊曰事未然缺次遠槐宮尚需蟬再嘶  
士食天祿行或使暗中自有神扶持我昔識君初未髭  
犀角雙盈方顙頤飽學武庫富蓄貯粹行桓壁微瑕疵  
過市目不視左右何啻董生園不窺含章晦美抱素蘊  
修之於家朝廷知一室萬里限戶闕脚跟不動名四馳  
譬諸豐城瘞寶劍紫氣貫斗當有時平生識字乃餘事  
倉頡科斗揚雄奇飾翠泥金寫梵夾凡善書者能辨之  
至用儒流董厥役借此進賢培邦基晦翁豈止能詩者

澹菴胡公薦以詩唐柳公權以筆諫忠鯁隨事堪箴規  
去去行行勿復遲未至烹雌炊炭度白玉之堂鳳凰池  
不着君輩當着誰

送滕玉霄張元樸管押地理書入都

滕侯酒酣宇宙窄長嘯詩成鬼神泣謫仙後身今李白  
一錦宮袍猶未得張侯乃翁官鼎軸芸香家藏百萬牘  
朝憲夜檠吟不足政須天下書遍讀四海萬國天一家  
東盡蟠木西流沙貢珍未貴貴圖籍卉服颶風窮島涯

玉堂衆雋修國史搜書北方遣名士若欲講知南地理  
亦合南州起才子所以滕侯暨張侯聯翩同作中原遊  
夜靜長虹貫明月春風穩送江天舟張侯富貴素所有  
相門會見魯拜後滕侯遭遇夫豈偶飄然掉臂奮空手  
金匱石室紬瑤編大書特書筆如椽成就堯典禹貢篇  
不數班固司馬遷

為合密府判題趙子昂大字蘭亭

并序

人之身天地之一物耳而人之心包乎天地之

外故曰方寸之中有六合君子之道可大可小  
唐太宗命褚遂良等臨契帖賜羣臣予嘗見減  
小字本極精妙今見學士趙子昂足紙大字蘭  
亭本尤神奇而妙歛之可擴之亦可雖筆法亦  
心法也歟

神奇變化莫若龍屈蟠可藏螺殼中一聲霹靂起頭角  
金鱗萬大橫蒼空右軍契帖不盈咫尺善臨摹者子趙子  
一觴一詠十九之方如帶玉滿匹紙小字古稱黃庭經

大字焦山瘞鶴銘小歛大縱出一手譬如寫真妙丹青  
寫真但要寫得似小纖大濃皆可喜小如眼中見瞳人  
大如鏡中見全身

題畫盧仝長鬚赤脚

玉川破屋數間洛城中一時際遇赤尹昌黎公贈以大  
篇意甚侈不數李渤溫造兼石洪買羊沽酒分俸給時  
攀綠駢下虛空月天桃李醺春風豈惟百世之下知盧  
仝併使長鬚赤脚名無窮誰其畫者善遊戲不畫盧仝

畫奴婢想見煎茶七碗時此曹顒亦霑餘味

平章呂公挽詞二首

文煥

難兄捐閭寄無復救襄人半紀嬰孤壘中朝扼柄臣秦  
非里奚智徐為偃王仁萬事由天命乾坤厯數新

燕頷逢荆鄂於今四十秋始聞降鬼國遙見拔瀘州廟  
議顒私意邊圉墮詭謀棄襄不令守鐵鎖靠江流

送金壽之江正寫金字經

碧落金仙躡漢庭梵書翻寫過東溟宰官嘗領潤文使

法帖尚傳遺教經子敬比蹤洛神賦率更婉美醴泉銘  
夢中五色文章筆視草鰲扉趣妙齡

題廬山白蓮社十八賢圖

并序

李伯時畫六士十二僧共十八賢外有籃輿自  
隨者陶淵明道冠者陸修靜一人下馬致敬向  
陶語其江州刺史將命之人乎淵明實未嘗入  
社為題詩曰

六老矍儒十二僧柴桑醉士肯為朋  
蒔蘆自與蒔蘆纏



更要閒人纏葛藤

題淵明像

慧遠無此冠修靜無此巾此巾要亦有無此漉酒人

題徐仲彬達觀亭

并序

以上視下曰觀

去聲

以下視上曰觀

平聲

易觀卦上

二爻以上視下下四爻以下視上初六六二遠

於九五而所觀猶有所隔可進可退惟六四一

爻最吉人臣之近君位而觀國光者也九五以

上視下乃堯舜禹湯文武之事上九無位而亦  
為下所觀乃孔孟之事漢書賈誼傳達人大觀  
史記作通人大觀索隱師古並無其音則平聲  
去聲讀之皆可義與易不同而通達道理太史  
公以為同死生輕去就於此爽然自失後人所  
學未至賈傳不可訾也兼此一達字非晉人放  
曠之達徐君仲彬利用賓于今日而有取於賈  
傳之所觀其旨遠矣予不揆輒用以聖賢之意

廣本旨為仲彬賦之

乾涵坤毓萬彙夥獨得為人賴鈞播八尺身為天地贅  
一寸心將天地畏道眼自應非肉眼以心觀物無不可  
靈臺光潔日月懸肯使一絲掛塵垢老壽龜鶴天蟻蟻  
博大鵬鯢小螺贏王侯雲霄縱翱翔奴隸泥塗淹坎軻  
雷霆起蟄春生兒霜露斂華秋結果防風九畝霸十圍  
痿痺支離蹢躅跛二五之精形相禪彼胡魁梧此么麼  
天所賦予各有命女子豈羨弧矢左螻蟻君臣鴈弟兄

道理大處無細瑣洪纖各遂逍遙遊續鳧之頸爾其巨  
徐侯讀書得玉匙聖人門戶啟關鎖用賓屢揚北上鞭  
大隱薦鼓南遊柁築室金陵割鍾山臨川僻學百義墮  
千古子在川上心想見解衣盤礴羸梧桐楊柳竹陰間  
菱荷疊重花婀娜弄丸一卷經世書內篇外篇夜燈火  
靜寂動感來無窮昭布森列俱帖妥通達居然今賈傳  
豈容棲遲老江沱乘流止坎大厥觀進退久速不預揣  
熏天富貴腊毒味涎詎肯流頤敢朶窓前草青鹿共眠

檻外沙白鷗同坐忘機得意茅三間焉用陶朱西施舸  
况又義方延碩師乃父析薪子克荷此詩適挾宇宙秘  
察君襟抱吾亦頗世間俗物未必識我知魚樂子非我

淳熙甲午東陽郡齋蘭亭

大唐天子給孤僧轉瞬人間幾廢興一幅永和故璽紙

入昭陵又出昭陵

唐太宗以御史蕭翼取永禪師袂帖已入昭陵溫韜發之再出人間定武

梅花本予舊有之今不易得此韓元吉摹本也

淳熙癸卯錢仲東陽本

永和貞觀晉沿唐奉詔臨摹老遂良展轉流傳非一手

虎賁猶得似中郎

太宗使起居郎褚遂良檢校馮承素韓道政趙模諸葛貞之流模賜王公

見張彥遠法書要錄蘇才翁云

淳熙戊申邱壽雋新昌石氏本

頗如畫手善傳神絕喜他鄉見似人俯仰之間已陳迹

如何千載尚如新

江陰邱府此本甲於東南永和九年癸丑至今大德戊戌九百四十六春

矣

張栻仲實見惠江陰邱本

絕喜他鄉見似人頗如畫手善傳神忽思今昔無窮事

十五迴經癸丑春

永和九年癸丑東晉穆帝聃在位之九年元帝睿建武丁丑中興之三十

七年貞觀八年甲午遂良摹本去修禊時二百八十一年修禊至今戊戌九百四十六年凡十五癸丑矣

### 小本蘭亭二種

子雲可擬易論無頗似蘭亭細字模始信聖經非小藝

不羞依樣畫葫蘆

文武之道或識其大者或識其小者此楔帖巧矣太元法言亦周易魯論

之小者歟逸少字可擬也聖人之經不可擬也趙子昂行匹紙蘭亭回曰此如寫真小如眼中見瞳人大如鏡

中見全身

北本蘭亭

一千年想永和會十九之傳貞觀摹此本中原今第一

真成一字一驪珠

近得此本乃中原本也雖定武本不可復得此亦近之

朱字蘭亭

傾城國色着胭脂紅字蘭亭又出奇比換鵝書更姿媚

一杯卯酒醉西施

相傳以為賈葛嶺石本如書板覆印用硃為之臨寫者頗放縱沓施以其

異也姑存之

題王春陽倣王晉卿山水圖



煙江疊嶂子能學都尉後身王姓同詩畫驚逢兩奇麗

賞音吾媿玉堂翁

東坡大全集第十七卷為王詵晉卿都尉賦煙江疊嶂圖十四韻晉卿和

之東坡賞其奇麗蓋畫興詩俱奇麗也古杭東衢王君微晉卿着色山水翠峰碧澗丹樓粉牆極一時之美而自題之詩亦佳豈果晉卿後身歟惜乎所遇之老夫不能如玉堂蘇公也

題李仲賓竹二幅

可是筆端如與可亦須胸次有東坡自從舉世誇崔白

似覺無人識李頗

李頗五代時南昌人墨竹自此人始畫譜僅取十二人有文同無東坡禁

元祐學也是時已有墨梅山谷花光詩亦不取陳簡齋所和張規臣墨梅五詩見知徽廟擢登冊府而畫譜不

錄墨梅  
何也

次韻受益再題荆浩山水圖當是洪谷子自寫所

居

太行荆浩之鄉里佳處立參仍坐倚崖樹澗石皆寫真  
想見含毫吮沁水當年自號洪谷子畫成署名細如蟻  
此豈自圖其所居屋上峯巒插天起柵門雞犬鎖寒林  
僮馬盤山暮煙紫高者佛寺平者川關仝范寬馬得比  
我少學畫中棄之時到古齋漫隨喜好古人多識古希

不意永嘉聞正始

戊戌端午

退休敢望賜宮衣  
破篋重尋舊暑絺  
梅子黃時端午又  
葵花紅處故園非  
畫符烏用元無病  
標錦休爭但合歸  
賴有故人餉新煮  
一杯草草勒魚肥

次韻文蔚約梅上  
人來訪

越人能詩

慙非好客鄭當時  
猥荷高人不見遺  
頓悟可能參佛理  
淡交誰是喜僧詩  
過從未許泥行數  
屬和多因險韻遲

彼此絨滕各收拾他年開卷兩相知

戊戌生日二首

貪得真迷境持平實悟門未妨人負我各要子生孫動輒聞誰死猗嗟幸獨存榮華何足記衰悴不須論

客舍逢生日隣家送壽星循彝須荅禮恃熟莫忘形把筆遲賡和開樽共醉醒五兒一隨侍心竊愧椿庭

俞鑑山月歌

詩人詩向虛空攬平地望月不可摸或謂高山去天近

好登東嶽陟西嶽嶽峰峻極未到天仰面難舐兔臼藥  
末由手挽月娥衣詩思肯從天上落不如斟月入杯中  
詩酒腸吸杯月空一杯一首百杯百天送佳句來長風  
仙人輕舉跨飛鶴游子歸思隨征鴻扶搖直上九萬里  
未辨頂摩丹桂宮所以詩人世難得倚靠梯凳探月窟  
山頭擎月月愈遠塵裏挾詩詩不出大江洶湧波跳金  
謫仙捉月淪米石是為詩人善搜詩何知君非今李白

送家自昭

晉孫

慈湖山長

號自庵

我身即此庵要識一箇自自心為庵主太陽了不二太  
陽本常明天半隔以地朝紅正晝白暮夜黃黑異其明  
未嘗減西沒復東出此心亦如此外物為之累去蔽實  
在我豈可自壅閼日能自用力疾鞭扶桑轡心可自用  
心明德永弗墜節飲自少醉寡欲自少寐自己有此寶  
碎璧肯自棄慈湖言本心似亦無可議未發缺存養所  
見恐未粹子往拜其祠於焉設講肆長短審取舍予奪  
謹廢置天日揭義理慎勿徇私意厚土埋金烏吾說可

一簞大明曉常升難昧萬目視老禪罵祖法不妨略一試

送天目吳君實館越

鼎黥汪  
綬外甥

天目山人客鑑湖請言近世兩鴻儒洪平齋集親抄否  
陸放翁詩背誦無綠芡紫萼乘月採黃精白朮入雲鋤  
土毛未負將軍腹萬卷撐腸定不枯

試問推潮鬼定知幾吳幾越幾西施八千又見陰陵散  
十九終存曲水之我輩不當爭外物如君可用要人詩

勉哉往學南山豹端復深藏霧雨姿

題布袋和尚豐干禪師寒山拾得畫卷

并跋

豐干禪師降猛虎布袋和尚愚小兒老夫見畫未親見  
唯喜寒山拾得詩

今有二異僧一虎隨之入城市一拽布袋引群  
小兒民間不鼎沸喧闐乎以人情觀之書本相  
傳如此既未親見不可信也惟寒山拾得有道  
之士實有其人有其事有其詩數十百篇如秦



樓有美女雜佩何珊珊鸚鵡花間養琵琶月下  
彈長歌三月響短舞萬人看未必常如此芙蓉  
不耐寒詩律精妙尾句有開有闔朱文公深賞  
之愚亦賞之故作如是題

題沈伯雋所藏趙子昂墨蘭

并序

今之墨蘭山谷之所謂蘭也一榦一花古之蘭  
根枝葉花皆香一樹而千萬蕊離騷曰紉秋蘭  
以為佩秋蘭兮靡蕪漢武曰蘭有秀兮菊有芳

今八九月開與菊同時淵明詩曰幽蘭生前庭  
含薰待清風清風脫然至見別蕭艾中東坡詩  
曰幽蘭如美人不採羞自獻時聞風露香蓬艾  
深不見今之蘭十二月正月開若蕭若蓬若艾  
皆枯槁未芽陶蘇詩指屈子之蘭耳然山谷之  
蘭盛行近世墨竹墨梅之外加以此品古畫譜  
亦所未有隨時之義一可賦趙子多能善書二  
可賦沈子嗜學好事三可賦詩曰

今蘭春秀異秋蘭世事隨時豈一端別有古人不死處  
陶詩晉字要人看

立秋

暑赦如聞降德音一涼歡喜萬人心雖然未便梧桐落  
終是相將蟋蟀吟初夜銀河正牛女詰朝紅日尾觜參  
朝廷欲覓玄真子蟹舍漁蓑煙雨深

曉起

夜涼無寐起吟詩正是秋風欲動時百尺樓高蟾獨掛

五更鐘過馬交馳道懷了了元無事世故紛紛總不知  
但欠山頭埋骨穴歸歟分付與諸兒

瑞雲院大樹林中二首

城中遙望萬重雲今日蟬聲始一聞略計此山松竹數  
漢時應比百封君

萬萬松杉萬竹枝人間應是少人知數僧瀟灑相逢處  
一鶴昂藏獨立時

三竺道中三首

武林風物異他鄉三竺山行草亦香村落尋常績麻處  
隔簾時復見紅粧

少人行處路方佳半著僧鞋半草鞋直到全無馬糞處  
山僮竹帚掃松釵

石溪清淺不容舟但有常常綠水流莫道江湖風浪濶  
此中涓滴是源頭

斷橋西人家三首

無數菰蒲間藕花萬絲垂柳曳風斜竹籬茅舍渾如畫

最愛橋西第一家

主人儻不粗能吟辜負湖天水竹林我若移家來此住  
詩人無數日相尋

望極蘇堤欲盡頭叢篁老柳水天秋船中遙看家家好  
却恐君來住亦愁

聞過

秋來火傘尚高張心定還能熱處涼自古及今誰不死  
寧人負我亦何傷緡錢瑣碎爭多少杯酒紛紜說短長

舊管釣臺時入夢人間未有兩嚴光

自覺二首

還將短鬢受秋風倏忽炎涼事不同青史合居人品上  
白雲肯到市聲中蕙有蘭藉何須飽芝製荷衣未覺窮  
駟馬高車足憂患五湖歸作釣魚翁

忍垢包羞混世塵胸中無物只天真平生我亦輕餘子  
此日君當恕醉人鍾乳金釵空喪志鱸魚蓴菜尚知津  
中行獨復雖差晚猶與初爰不遠隣

問西湖

誰將西子比西湖  
舊日繁華漸欲無  
始信坡仙詩是識  
捧心國色解亡吳

西湖荅

濃粧淡抹比蛾眉  
多謝蘇仙內翰詩  
若使朝廷無宰詔  
未妨宮掖有西施

送王宣慰中齋上溫州

剛中兄積翁父伯大  
先君同甲戌表榜

兩朝參預慶源長  
愧我蒹葭玉樹傍  
先世聯龍虎榜



難兄復接鷺鷥行江東連帥迎前纛  
淞左侯藩餞去艎每愧淡交無以報  
願聞所至有甘棠

夢草堂邊下榻時隙駒四十五年馳  
東嘉太守真知己西里先生共賦詩  
前輩風流元不遠故家文獻未全衰  
留耕相種書元帥好與儒壇建鼓旗

次韻酬吳僧一山行魁

為僧應勝我可惜墮禪林鑄錯剪鬚髮  
書癡雕肺心聞名梅止渴晤語早逢霖  
一句詩傳世猿邊幾夜吟

八月五日病中

於心敢自欺但恐不精思未覺扶顛易方驚悔過遲病  
堪長作客貧可薦招醫觀井如彭祖聞諸牝角時

先師  
八叔

父元圭言有  
彭祖觀井圖

送仇仁近持山村圖求屋貲

浪多年二十是事弗如之老我初登第聞君早解詩風  
霜懸齒頰錦繡簇肝脾才是通漫刺誰非獻屈卮貴人  
遺世患寒士扼時危道泰官猶冷身窮氣未衰雖無間

屋妾已有肯堂兒村擬茅齋卜山將畫卷隨賀成良匪  
易衰益復奚疑歲稔田收倍秋涼渚泛宜定應爭倒屣  
不惜共捐貲千斛歸舟駛梁文想預為

八月十二日過湖

荷已無花柳欲陳秋風颯颯水粼粼湖山慘淡西施老  
細看終於勝醜人

望西太乙宮四聖觀半為僧寺

紅墻半舊粉墻新泥塑金塗各有神僧道不須閒計較

等為和靖守墳人

三天竺道中

三天竺路漸平登高似雷峰塔幾層山到無人行處好  
松陰萬樹立孤僧

登上竺興福寺新閣五首

獅子峰高側見巔怒飛危欲墮簷前千松萬竹闌干畔  
瘦骨秋寒似雪天

面面峯巒傑閣新好山借我倚欄身商量壁記留名易

未是題詩第一人

跳過西湖萬萬重  
半天蓬鬢洗松風  
自慙不得留終日  
又向船中入市中

乳竇峯前路不窮  
穿林踰嶺浙江通  
紫陽山雨釣臺月  
消得潮頭幾信風

燕蟄蜂瘖菊始開  
秋涼入骨病堆脰  
吟僧欲約山中宿  
後夜須携絮被來

三天竺還五首

城中決定少新詩  
便向湖光也未宜  
我有新詩無數處  
三天竺路筍輿遲

松枝垂地蔭松身  
恨不移家此卜隣  
石上一根長數丈  
似吾細看更無人

澗晴石出水穿沙  
萬樹松杉隱數家  
一鳥不鳴風不動  
忽聞林下響縑車

山中事事勝人間  
莫怪山翁喜入山  
才說出山心不喜  
又將身世墮塵寰

七十二翁頭雪白弱冠初遊鬢如漆除却一二老山僧  
獨來獨往無人識

送周漢東入都

鮪

并呈徐學士子方閩學士子靜

盧學士處道

同是黃山採藥人相逢十載客中身贅疣天地吾無用  
萍梗江湖子亦貧曳組定趨金馬署揚鞭初闖玉京塵  
徐閩盧老如相問向道猶餘漉酒巾

次韻受益九日

歸歟豈少舊林塘何用痛瘡陟彼岡白髮轉添吾輩老  
黃花不減去年香每嫌佳節多風雨猶喜炎歊緩雪霜  
典盡寒衣償酒債衰翁聊以醉為鄉

聞謗

脩身可用要人知暗室孤燈敢自欺赤口燒城市有虎  
熨平寸地聽群兒

寓意

季路三都不盡隳城狐尚許脫阽危一日西家鼠運去



太邱忽有社亡時

寄題曹氏居竹

維古修竹鄉君子世此居殿壤既宜竹種竹環其廬根  
不取馬箠笋不供盤蔬永保歲寒盟子孫樂只且老夫  
何當曳長裾一窺旌節舊門閭華亭豈羨揚州鶴松江  
自足馮驩魚田園伏臘頗有餘竹中明燈夜讀書

送西湖書院趙山長

良秘

東南大郡莫如杭其西有湖誇錢唐兩賢刺史一隱士

春秋祠祀專烝嘗芙蓉楊柳鷗鷺傍四時不絕炷瓣香  
後來好事者不作屋推階地莓苔荒錢唐城中十萬戶  
自古無人興書堂一朝書堂突兀起鷗吻大殿環脩廊  
其上高閣觚稜驤其下豐碑鐫琳琅香山東坡和靖叟  
三像野服無金章寓意貴德不貴爵高風大節遙相望  
諸生大帶冠昂昂遴選師儒恢典常文星燦燁教雨滂  
誰其為此參預老百世不朽徐子方趙君牽聯同不朽  
首助膏腴五百畝

題王起宗小橫披水墨作工密勢

秋光一片冷於冰  
山寺雲深隱幾僧  
畫出江村太平意  
漁樵無事歲豐登

題王起宗大橫披水墨作遠淡勢

卧龍峰下草廬幽  
門外橋橫水自流  
瀟灑王郎只數筆  
淡雲疎樹一天秋

臘月菊

并序

江南十二月見菊花常事也淵明乙巳十一月

賦歸去來云松菊猶存可想也其間有一種開  
遲者十一月十二月始開然極寒多不能開而  
槁枯仍須向陽為上今廉司韋僉事出此題下  
杭學衆皆賦之亦擬作

九日侵尋蜡日徂金鈿尚可泛屠蘇  
鑿冰池畔枝尤勁  
栽竹林邊蕊不枯  
同味避生新  
枸杞齊名久  
謝舊來  
芝  
土龍棄我登高侶  
端肯趨時媚我無

送宋昶明仲湖州學錄

小山會之之孫  
悅齋和中之子

為學有本末根固枝必稠又如水有源源清無濁流顏  
子先四勿韶冕患不優曾子貴者三豈於籩豆求九經  
始慎獨八目正乃脩我嗟半山學不識濂溪周遠取湖  
學意麗迹窮雕鏤邊防與水利講諸螢案頭是致青苗  
法規摹國師劉汲汲淬事功方寸俱繆悠堯舜不牧羊  
羿射羿盜舟農圃有弗如問陳有弗酬國定一正君此  
道軻傳邱茂叔二程張羅郎疾如仇永樂西事敗談兵  
茲可羞陵夷至宣靖地下噬臍不此心主精一焉用功

利謀所以汗背勃見嗤戶牖侯君今錄泮事往邀白蘋  
洲臆對議湖學豈無苔溪鷗

寄撫州呂使君

元愷

索李鴈湖注王半山詩

一別龍門十五期湓城日夜夢魂馳歸裝初解臨川邸  
注本應多介甫詩定復一鷗能見惠遙知五馬未相遺  
鯉魚直下西江水兼有書來慰我思

次韻高子明

昇

投贈二首

中原從昔信多艱尚有文才與古班詩律規隨元好問

樂章雋永蔡蕭閒要知精會神全處須到聲銷色泯間  
此話無人膠鳳皆一蓑煙雨紫陽山

四時天地共成春千古羲黃寸壤隣空復飛車行萬里  
本無弱水隔三神大人尺蠖同伸屈俗物群狙易喜嗔  
子欲從吾參此妙倒翻銀漢洗塵巾

寄贈集虛孟高士

天地春藏凍核中時來蜂蝶閑東風萬端變化根無極  
一寸靈明裹太空妙處千江分朗月飄然六合點飛鴻

守玄知默交龍虎肯泥丹爐子午紅

寄贈介石沈高士

并序

字書介訓問予幼年讀易有一家說謂介乎兩石之間恐左觸右捺即去之不可緩也今諸家或謂豫之六二其介也過於石似乎石乃堅勁之義恐未必然細味之介于石與困于石文法同不待築磻而遠引是為知幾敬為洞霄沈高士賦之



牽确崎嶇峭壁間險過巫峽更潼關石頭莫待微相磕  
便合收心早早還

兩邊巉險我居中豈可挨西又捺東冷笑主人忘曲突  
泥梁燕燕說春風

題東坡先生惠州定惠院海棠詩後趙子昂畫像

併書

五季乾坤混為一艱難得之容易失一拳槌碎四百州  
新法宰相王安石二蘇中尤惡大蘇周二程張俱不識

紹聖姦臣講紹述元祐諸賢紛竄斥東坡飽喫惠州飯  
心知惇卞乃國賊恍惚他鄉見似人海棠一株困荆棘  
海內文章蜀黨魁蜀第一花世無匹邂逅相逢心相憐  
瘴雨蠻烟污玉質憶昔蒟醬筇竹枝適與張騫遇西域  
彼徒生事勞遠人此感與國同休戚屈原放廢郢都喪  
箕子囚奴殷錄訖惠州未已更儋州必欲殺之至此極  
立黨籍碑封舒王竟使大梁無社稷此詩此畫繫興亡  
可忍細看淚橫臆

東坡先生惠州海棠詩十四韻趙君子昂所書仍畫東坡像於後以歸竹

軒盛君紫陽方回獲  
觀題詩十四韻識之

十月二十二夜三更讀清波雜志至五更

遠書荅一封近詩寫數首小雨客不來我亦厭奔走茗  
罷午窓倦草草具杯酒獨酌政自佳啖茹聊誑口人生  
一日事忽已卯至酉就枕不解衣須臾鼻雷吼起問夜  
何其禁鐘云已扣頗欲復謀飲床下但空缶再卧卧不  
成燈膏幸猶有坐至五更轉讀過一寸厚是書必有益  
但當審去取著此者為誰未欲斥氏某金陵三不足奎

聚天地剖尊之配孔庭邪說陰授受後世公論定馨穢  
兩不朽未知八寒獄惇卞果入否

夜夢呂洞賓仙翁忽憶戊午西遊岳陽樓老木居  
士祠觀洞賓像與今南谷高士巾褱政如此奇曉  
起再賦

夜來忽夢洞賓仙四十年前戊午年老樹精祠觀畫像  
岳陽樓醉誦詩篇喜逢巾褱真相似獲接杯行豈偶然  
喚起沅湘舊遊興洞庭飛過水如天

題苗經歷耕野

士以仕為業野處無所耕近世所大患苟進頗厥聲蘇  
子佩六印相國不為榮坐乏二頃田此事誤平生廓然  
天壤間一犁早經營春夏刈麻麥秋冬穫稻粳蓋頭有  
把茅餬口有杯羹豈肯捨此去垂涎公與卿不遇湯先  
主伊葛亦何成聘顧不至三寧為畎畝駟馬高車間  
一跌足可驚豈如牛背上穩卧無歌傾調鼎與荷鋤心  
手自權衡我有一飽資去就萬事輕

十一月二十九日壬子喜雪

掀冰驚起凍髯翁一色樓臺曉未融  
酤肆定應昂酒價篙工是處打船蓬  
讀書牕上紙偏白躍馬街頭塵不紅  
憂國願豐心絕喜可能兒女絮因風

雪後

誰呵凍筆解吾愁盡到寒天欲盡頭  
漁子一蓑垂野釣詩翁百尺倚江樓  
光添幾夜梅窻月暖望明年麥隴秋  
却憶半山服坡老義魚奇韻費雕鏤

題醉仙圖

醉者十九人僅七人

晉七賢歟唐八仙歟  
胃吞萬古氣高九天糞  
土軒冕膏肓林泉造  
性命之間與眇文章之  
蹄筌見李耳於樹下  
參伏羲於畫前爰養  
素於黃庭亦存神於  
丹田既萬累之盡掃  
惟一真之獨全生涯  
無他糟邱酒船盡史  
遊戲醉態踈蹢或相  
舁扶或相攀牽或袒  
而舞或跣而眠堂堂  
八尺如顏玉山炯炯  
一寸如珠在淵老夫  
一笑知其然非愚非  
癡非狂顛

宗陽宮訪葉西莊亭宗飲尋杜南谷道堅不值留

詩并呈戴帥初

我不識南谷亦不識西莊偶然詣仙境一舉數十觴南  
谷出何之童子煎茗忙栢林中有梅不見惟聞香

丹青歌贈王春陽用其神丹歌韻

世上若無鍾子期破琴勿為俗子嗤人間亦有王昭君  
奈何衆女嫉蛾眉我粗能詩子能畫筆力豈不山可移  
希聲絕色識者少妾婦嚙嚙仍嘻嘻宣和畫史我嘗讀



山水王詵併郭熙儋州禿翁早題品元祐文章衆首推  
坡詩一句不收拾熙豐黨遺羣兒大坡小坡俱寫竹  
黥不登載無一枝河東顓征領節度賊貫時實籌兵帷  
謂此昏掾亦善畫繆取人主玉色怡畫之是非且不辨  
國勢竟隨閹宦痿花光墨梅方盛行乃坐山谷屏斥為  
簡齋五詩動萬乘此等佳作亦棄之五日十日一水石  
王宰見賞杜拾遺如許名手無其名可謂世衰人才衰  
筒不肯破菜不潑朝士閱籍塗粉脂青城北轅五馬渡

正邪稍稍分茶飴萬事盡如畫譜意焉得炎正不中微  
雪蘇黃冤尚伊洛始覺七政齊衡璣錦囊玉軸鎖御府  
徑與宗祐同灰飛米元章史論稍公遺物太倉存一稊  
子能畫亦能詩衆人不識不必疑相逢但當醉如泥

次韻受益題荆浩太行山洪谷圖五言

畫聞與畫見巧拙不同科譬如未入蜀想像圖岷峨可  
以欺他人不可欺東坡又如寫神女瞥然巫山阿宋玉  
一點筆眸子橫清波上黨太行山懷孟踰黃河水落天

井闌長劒垂新磨昌黎尋李愿借車方口過劈斫開崖  
壁巨扁侔斧戈荆浩家其間煙霞恣麾呵親見勝剽聞  
胷次所得多天亦寶此畫易世終無他退之太行詩幼  
誦今鬢皤洪谷太行畫恍兮聊浩歌

題劉養晦練江并序

文炳

謝朓詩澄江靜如練本謂宣城今江陰曰澄江  
因而稱曰練江黃台詩千尋練帶新安水予所  
居新安江水至清亦曰練江劉君文炳養晦江

陰人也而寓毗陵名其室曰練江詩曰維桑與梓必恭敬止不敢忘父母之邦也予新安人而寓武林見養晦練江之名喜而賦詩傳曰適他鄉者見似人而悅偶有契於予心亦不敢忘桑梓也

朝為練江吟暮為練江吟練江果何在曰在江之陰練江不在眼練江常在心譬之古君子土思操南音褰裳涉其淺拏舟濟其深練江可以釣得魚沽酒斟季子佩

六印陶朱賈千金此事決失望鷗盟難重尋

缺

落糞本

木春返來賓禽矯首天都峯吾亦辭武林

次韻許瑞石送邵容齋見寄

應元宗偉

欸段餘生謝伏波詠歸心事竟云何藕花又赴榴花發  
詩債仍兼酒債多擊壤先生黃色論賣薪老子翠微歌  
吾儕曾次元相似誰道金章勝釣蓑

東赤南白西黃北黑此正色也曉午暮夜見之  
矣吾終日言而未嘗離於是蓋天地萬物之理  
盡在是矣邵康節觀物外篇語回嘗嘆服至妙  
至妙東日曉而紅赤日午正南而白晝萬物仰

觀天下同一光明至於西則黃昏矣夜則為亥  
子丑天地黑矣日在地下所以世界全黑人生  
百歲亦有此赤白黃黑之限過午則日昃也元  
會運世一年百年千年萬年只於此處玩之見  
天地萬物之理第五句  
引此事邵君家故事也

### 嘆士行

學問何難博文詞亦易工自非知道理更是長姦雄飾  
首冠章甫操心竊大弓金椎發塚輩張竦與陳崇



桐江續集卷二十四

欽定四庫全書

集部

桐江續集卷二十五

六

詳校官中書<sub>臣</sub>孫溶

主事<sub>臣</sub>呂雲棟覆勘

總校官無吉士<sub>臣</sub>倉聖脉

校對官典簿<sub>臣</sub>劉景岳

謄錄舉人<sub>臣</sub>陳賓



欽定四庫全書

桐江續集卷二十五

元方回撰

老矣

倚樓開戶展青銅老矣猶能酒面紅  
浪許滿頭生壽髮  
幾堪落葉見秋風  
每思舊事全如夢  
自喜新詩漸不工  
棺槨衣食俱未辦  
他年何處葬虛翁

老人髮落復生是為壽髮

送溪堂方先生五世孫觀歸馬金

鑑堂先生省元太博恬弟別省第二縣丞移忠

茅田方氏十世也溪堂先生淮西運使寺丞十  
一世也先君上舍經幹元章十二世也回十三  
世也秋崖先生知郡吏部岳姪貢孫未攷觀溪  
堂五世孫也皆西漢方公紘東漢賢良洛陽令  
仙翁儲之後

河南遷漢歛東鄉遷歛西鄉自有唐溪老堂堂首科級  
茅田疊疊冠文場考亭郢鄂桑梓友孝廟乾淳駕鸞行  
五世賢孫吾獲識根源同是洛陽方

次韻贈吳羽士月湖大椿

前閤門宣贊舍人嘗為羅殿國安撫使

萬事平生大道杯恍然曾過望鄉臺榮華外物毛端細  
飄忽陽神頂上回羅殿堪思蠻嶠瘴鬱儀永謝劫池灰  
何<sup>缺</sup>乞我刀圭劑同見蟠桃幾度開

醉贈宗陽寓居九江道士胡虛白祈雨感應

欲血蛟螭出太阿已翻銀漢下天河築場預覺人人飽  
賽社應聞處處歌彈指三聲轟霹靂張頤一噴響滂沱  
何曾別有神仙術止是精神感格多

改白雲庵疏語為李道大

昔有隱君子中年洛陽居擊壤歌太平洛人為結廬名  
曰安樂窩花間行小車昔有賢宰相退休寓洛都心乎  
愛此老卜鄰同里間買園廣其宅至今傳畫圖賢宰富  
彥國隱君邵堯夫走也非隱君賢宰今不無草草白雲  
庵隙地日自鋤欲築三兩亭冠蓋延朋徒勸君可綠蟻  
揣已無青蚨解劍肯指廩芳名宜大書

重陽後三日猶熱多病者死者

重陽已過兩三日真好菊花全未開合已樓前橫鴈字  
却於地上洶蚊雷爬搔最苦瘡瘍痒擗踊時聞哭泣哀  
南客不堪況北客生民何罪降天災

題錢選木芙蓉

東籬相伴殿西風我識花神品藻公秋老別無第三品  
傲霜黃處拒霜紅

題達磨渡江畫

祖燈傳到老盧奴解道元來一物無葱嶺笑伊攜隻履

渡江更要一枝蘆

九月二十二日曉倚樓

北斗掛樓北曉柄正指東乃知今夕昏移以招西風南  
州霜未降九月已過中候蟲既無聲天猶遲過鴻一歲  
事垂了吾生將無同春草百種死夏木千林空依依墻  
壁間獨剩殘菊叢日出萬馬動誰其知此翁

九月二十六日雪予未之見北人云大都是時亦  
無此寒

立冬猶十日

十月初六日  
癸丑立冬

衣亦未裝綿半夜風翻屋

兩夜

大風而雨

侵晨雪滿船

寸許惟船篷最厚

非時良可恠吾老最堪憐

通袖藏酸指憑欄聳凍肩枯腸忽蕭索殘菊尚鮮妍  
貧苦無衾者應多疾病纏

### 十月七日早起

已亥十月六是為立冬日是日晴頗暄虛叟偶飲客醉  
卧二更醒起視天宇黑三更至四更大風一何急吼哮  
甚江潮十屋九仆壁五更再倚樓雲掃衆星出我樓正

向東北斗掛東北其杓漸指南正東起太白日躔氏近  
房紅氣卜晴色萬馬漸次動鐘鳴戍鼓鑿今年未有霜  
貧民或締綌忽念十日前霰雪已至集痢瘡死者夥咎  
徵復不一所喜浙田登百姓不憂食

次韻吳僧魁一山十絕

百結袈裟破唐帽子為何物我為誰孰知各有直鉤釣  
解出珊瑚海底枝

天河瀉水洗心君瞻眼能觀贖亦聞不是唐皇迎佛骨



大顛焉得見韓文

潘江陸海一笑唾暫借禪衣隱此身坡谷兩翁合為一座間始可着斯人

七十三迴生一陽子年未半升我堂筠溪牧潛即汝是一繫驢橛須耐霜

筠溪四十三歲殀師弟與兄傳夜衣國手碁高更有着百年政恐疾於飛

已學故學天隱說多因誤剃鏡中頭戲拈當日顏良案

兩足何堪踏兩舟

未出家前讀孔孟書為  
故學出家後曰已學

長安應制住紅樓浪惹玄都紫陌愁天目有山無捷徑

落花莫放出溪流

隋朝檜下訪仙真五十年前夜榻身至道宮前天目頂

羨公去作卧雲人

予辛亥年二十五以呂竹坡先生午  
薦訪洪中書後峴先生勲問學宿天

目山下道宮今  
忽近五十年云

東南衲子密如雲何限叅寥與惠勤泉下歐蘇今不作

伽佗祇夜亂紛紛

高安僧寶姚圓至鹽水誰其成醬水莫為猢猻打筋斗

迴頭不記讀書燈

前住建昌軍能仁禪寺僧圓至字天隱古筠州人癸丑廷魁姚公勉之猶

子寶祐丙辰生咸淳甲戌年十九出家至元元貞間住前寺二年棄去卧廬山大德二年丁酉圓寂年四十三有天隱禪師文集若干卷又曰筠溪牧潛集文近世僧之所無而殍可痛也其友吳僧行魁一山上人朱姓咸淳戊辰生年三十二求予序其文且賦十絕辭去將隱於天目山之西峯依韻和以送之云

鄱陽湯仲材以其家息庵存齋東澗三大老鄂

州黃龍寺僧惠璋入石詩裝為一軸求士大夫贊

頌紫陽山下方回之先人字元章嘉定甲戌與晦

靜先生同年為下偈言而不及此意可乎仲材能  
作祇夜回作如佗可也

黃鶴磯頭百戰塵黃龍詩刻尚如新終然峴首碑安在  
羊祜元非死朽人

息存東澗三湯老文我平生盡見之身到黃龍山幾度  
却慙欠讀惠璋碑

晦靜先生甲戌榜元章先子幸同年升沈一付六如夢  
休賦青雲紫陌篇

水繞芝山過紫陽倒流不解上南昌兩家俱有傳燈子  
始信真源氣脉長

送崑山州教劉表姪

紫陽山下世婚姻幾度家因火後貧早是前修曾種德  
政須後嗣更提身秋霜白筆辭臺掾夜雨青燈管士人  
碩果元來真不食未妨徐動蟄雷春

九月雪十月雷記異

九月二十五夜雪南天稻梁未全結十月二十五夜雷

東風桃李俱誤開七十三翁駭何謂雷舊慣聞雪則  
未水旱國家有倉儲人能寡慾疫癘無

題鄭提學孔明敬齋

昭祖

恭惟方寸心表裏無將迎妍醜物不逃宇宙大明鏡時  
開復時闔靜定動亦定孰為磨且奩塵垢敢吾競徐步  
衝牙和儼立章甫正威嚴修德容戒懼毓景行典謨冠  
百王首言欽恭敬慎寅與祗讓惴惴遠機穽怠慢惟不  
敢茲其所以聖三畏四勿傳孔顏曾思孟洛學至正叔

主一肅正命乾淳朱逮張銘箴互規詠興室鬼神臨寐  
枕雷霆迤凜若對廟祭嚴於聽軍令古君子必爾持  
身以莅政保家雲仍長理國彊以靚繫予幼不學乃有  
東家鄭一謹衡萬邪道涯自孤泳何當躋公堂幽話聽  
犀柄師授分所聞庶盡人已性

己亥十一月二十一日長至前一旬書

北極地上三十六度出南極地下三十六度入四海之  
內居中國不見南極見北極東生西沒一輪日西沒昏

黑東生白春分秋分晝夜中天上地下度數同地上天  
少日晷短子月日南而北返地上天多日晷長午月日  
北而南行四時成歲歲如此日南日北而已矣一百八  
十度有奇不過一往一來耳或謂四游升降殆不然所  
以景祐新書刪其篇

信州道士蕭了空坐逝或見其在湘潭總府貳蕭  
公用之為作贊亦自號悟空

了了了空空空空心肝不在臭皮袋中想見出神似



蟬蛻可能吸露更餐風 可能吸露更餐風 一悟懸知  
了萬空何似老夫酒肉漢死時合眼閉棺中

送胡仲虎歸婺源并呈江山長霑

大儒疇昔起乾淳天地星源一脈真肯使我為修學記  
始知君是讀書人流泉要驗胸中活死草無拘紙上陳  
太極初生第一點尋根細認古今春

題東平張智卿梅軒嘗以墨梅一幅自隨

汝智年  
五十五

兩入  
交趾

大庾嶺頭江南北生平走遍梅花國天下梅花詩最難  
和靖居士占第一七十四翁詩萬篇一句梅花吟不得  
譬如江夏黃鶴樓既有崔顥無李白何人幻出一橫枝  
毛穎陳玄塗側釐不丹不青逞妙手月窓瘦影吾能移  
真梅難賦賦寫梅虛更大叫尤難之前身相馬九方句  
馬能壓倒簡齋詩張侯隨軒梅一幅什襲珍藏過寶玉  
南征不取萬戶侯北歸未即九州督借梅為題求詩人  
中原名士詩滿軸和靖簡齋亦不無顧慙才盡難貂續

張侯今在西湖隈竹籬茅屋局蒼苔我亦自有梅世界  
紫陽山中歸去來梅花開時看梅開花未開時看畫  
梅不用雕肝刻肺被梅惱但當一杯一杯復一杯

戴帥初賦道人蕭了空坐逝出神事借韻

漆園老子蝶魂飛維氏仙人鶴馭歸往事何憑煙漠漠  
餘生幾度雪霏霏早容身廁三千列偶許年過七十  
稀籍湜叛韓吾豈敢平生不慣食言肥

臘八日未雪不寒

寒暖違時節於民有弗堪豈應今臘八恰似舊春三夜  
缺蒸膚汗朝壺溢唾痰渾疑北風雪不肯到江南

十二月大暖雨二十四晝夜二十五日始雪

夜來聞祭竈猶賣膠牙錫雪欲為南瑞風纔作北聲  
今年全不冷此月未嘗晴造化難窺測神奇易變更  
淫霖過夏滂槁樹迸春英熱熱如三伏飛飛忽六霏花  
瓶梅盡落蘼蘼菜尤平欲掘餽鈍薺嫌泥懶出城

歲除次韻全君玉有懷二首

心事天涯客海涯自壽何止一毫差  
枕詩夜夜歌簷溜  
濁酒朝朝漉井花  
元日慣曾經百窘  
幼男勉為講三加  
揚揚喝道樓前過  
肥馬輕裘幾子華

全老忽貽寒夜句  
歲闌吾黨久離羣  
一場噩夢三千字  
百載頽齡七八分  
孰與輓前軒  
此士端能殿後棟  
斯文鄉讎禮失求諸野  
小鬼應猶畏竈君

庚子元日

臘天何故燠於春  
恐為衣單念小民  
略見雪纔餘一寸

十二月二十六日 巨堪雨却過三旬野中薺麥不勝旺市上杏

桃無數新白盡此頭浪多事可憐七十四年人

以桐江舊詩十五卷呈范君澤

人品懸知大不同一絲羞見釣臺風  
七年假守如虛叟萬首新詩似放翁  
貸死偶餘吟鬢白每生猶想戰塵紅  
范侯胸次秋天碧好借寬閒翼斷鴻

正月四日大雨不已愈暖不寒

吳山勝概甲杭州正旦清明到上頭  
紅袖南人簪翡翠

金鞍北客驟驂騑豐年似覺春尤好新歲何為雨不休  
自笑詩翁百念冷尚儕癡子說閒愁

次韻全君玉元日二首

五更皆早起惟我是閒人展鏡鬚仍雪添杯臉暫春有  
終還復始無舊不成新萬古燒痕意陳根豈盡陳

春放諸郡國漢守喜惟良旦宿重中尾時花競向陽古  
今新舊歷老少後先觴萬事皆如此無如且醉狂

次韻君澤正月五日早見示

人人有此珠萬古天地寶法當潛厥光蚌殼護其表能使華嶽移可叱峽流倒未若牀缺足梓匠不自造脫華培深根屏翳返內照與辨以興戎寧訥而出好恭惟羲皇心豈有夜與曉我眼徹地底常見日皎皎爰自彖及繫纂述屢脫藁仙游慕昇飛佛障怯煩惱九轉與八解終不擺纏繞彼豈知吾學往來玩大小艮止體陰負離明決陽抱平生無所媚不竈亦不奧突過子雲玄眇視老氏妙慎察進退間以為先師報宜耦長沮耕皇待方



朔詔黑頭氣公旺黃馘項吾槁一當蟄幽閒一當翔穹

昊何以明其然

原缺三字

衰老

次韻君澤夜坐示子姪三首

燈影稀疏兩岸樓市聲已寂睡聲勦幾家夢斷三更過  
此老心窮八極游服氣仙人吾不學坐禪釋子彼何求  
夜思晝讀諸郎識俛仰青春鬢忽秋

一樣乾坤幾樣人甌生塵異襪生塵寒牕黃卷青燈雨  
煖閣金釵玉笋春誰同公子夢方魘我與先生詩又新

原缺二字  
兒曹供筆墨為言不是寫真真

兩脚如麻坐到明雨樓聽盡五更聲無人共唱尋尋覓  
有子聊教仄仄平凌室不能藏臘凍稼場或至誤秋成  
誰知憂世書生意惟願天階正玉衡

人日立春記苦雨無冰

三十七日晝夜雨中間一雪終無冰今日立春遇人日  
問天肯晴天不應東南我記前庚子徽城紙包餽杭米  
乞人搶奪人食人旱極西湖乾見底今我七十四歲翁

苟全性命遨春風  
略雪不冰又庾子  
幸而去年秋猶豐  
西湖莫作癡猫守  
紫陽山下可歸否  
天終不殺好心人  
有錢買花仍買酒

正月十九日四更起讀朱文公年譜至天大明賦  
十二首

夜寐若無三斗酒  
夙興不待五更鐘  
浩歌閒把鐵如意  
缺慕先生憶卧龍

顛楊仆墨詆蘇張  
推挽時君可帝王  
軻死不傳今再見

一時無數起臧倉

獨能有眼識延平  
濂洛淵源集大成  
早負性資專問學

後生豈可少先生

鄉國追封初豈意  
師垣極品亦何心  
考功郎議一字

原缺

二相斯文上帝臨

王道浪談行霸說  
儒言陰用佐禪機  
貪狼弧矢觀星象

天遣吾公闢此非

本無極老謂主靜  
不遠復翁言內腴  
紙上仙方誰解服

尾公羽化上天衢

草制無知傳伯壽問詩不荅陳傅良王淮林栗胡紘輩  
仲尼日月曾何傷

孟子告子辨內外漢王項王爭雌雄誰歟著定會陔錄  
梭象終輸與遜翁

四世東南保太平有君無相廟堂輕具知人眼識朱子

獨趙汝愚陳俊卿

紹興至慶元宰相皆不知文公

澹庵老薦此詩人屈道何妨可致身負鼎干湯公豈肯

本來餘事壓黃陳

文公詩絕妙  
在黃陳上

考官蔡茲取三策三奏賞音汪應辰天下未嘗無識者  
近來識者亦無人

開禧嘉定擅權臣地下眉頭想更顰  
化遠傳衣至亡國止緣不用讀書人

久不作詩非避俗議偶老嬾耳次范君澤韻

俗全蝟毛奮老倦龜殼縮閉門自著書  
此外百無欲試將雙鬢比我白君尚綠  
固宜斗百篇醉不問今昨異端

朱翟徒孟子闢之廓傲睨則有之未必果落魄焉得百尺樓與公共盤礴坐令許汜輩螟螣仰黃鶴

讀魏鶴山先生渠陽集五首

登門四十九年多細讀公書百遍過今歲摘抄靖州作

遜翁堪配不傳軻

回壬子年二十六靜齋先生知徽州十二月先生以回詩請入書院

瀛翁傳到紫陽朱復見嘉端此大儒一論道原一原道他求倫擬漢唐無

漢唐臺閣畫功臣何似宣尼從祀人欲繪兩賢繼張呂

臨邛魏老建安真

投荒彌遠兇徒熾出督清之狡計行得柄欺君例如此

國亡徒剩正人名

瀛登湘渡偶皆同一了乾坤此兩翁

元豐二年己未陳忠肅公進士第三

慶元二年己未鶴山亦進士第三崇寧五年丙戌四月七日陳忠肅自謫廣西還渡湘鶴山謫靖州亦以寶慶二年丙戌四月七日渡湘先是魏之家人夢忠肅來降生故名了也前後身吾雖未信俱

遭權孽肆姦兇

范文正公楷書昌黎伯夷頌平江李使君信之久



藏真本以歸文正遠孫族長士貴祠以少牢復其  
家

班固人表吾嘗疑第一武王二伯夷我謂伯夷可第一  
武未盡善宜二之退之第一唐文人希文第一宋輔臣  
韓為夷頌范為寫三絕誰為什襲珍星奎運踰三百年  
皇祐慶厯諸鉅賢逮至渡江乾淳後珠題玉跋盈長篇  
范氏衮衮饒公侯幽州枯州至蘇州行軍元昊驚破膽  
義莊睦族春復秋子子孫孫居吳中

范丞相純仁  
以下皆是

指李

後人今黃龍

謂平江使君李公信之逸甫

錦囊偶貯此三絕燕香夜

寒吐長虹袞衣繡衣觀且誇

袞衣謂馬右丞繡衣謂完顏廩訪

故國喬

木興咨嗟大尹不吝歸趙璧祠以少牢復其家提學翰

林索我詩

謂范公君澤

肯捐此寶真復奇授者良難受者易

即此可刊遺愛碑

### 送張伯起入都二首

鄧禹雲臺功臣年二十四為三公然自量其才

可平世文學掾耳杭張君伯起任桐川學正滿

始入都問文學選使之年七十矣遇不遇之分  
如此予謂絳縣老人過君三歲始有趙盾之遇  
士不可以老自棄也

元侯可文學未壯冠貂蟬之子觀光日前修致政年芹  
宮堪注擬瓜戍尚遲延定有羣公薦班行綴集賢

西湖風景異因仕住桐川太守令求宅諸生為買田冷  
官清可喜遠道老堪憐何似嚴灘守投簪二十年

二月朔大雪已五日三首

侵尋半月是花朝大雪漫天五日飄臘月如春衆芳吐  
繁華時節却蕭條

燕山雪花大如席豈料江南亦見之臘前六出知焉往  
却在春風二月時

牛馬毛寒縮如蜩古今此句絕奇奇今春大雪亦將爾  
驚死無聲社燕遲

燕山雪花大如席牛馬毛寒縮如蜩此李杜所以為李杜也二句奇

怪相敵故拈出用之

題趙子昂摹唐人二戲馬駒

我嘗遠過燕山北樹木已無草一色騏驎騁動萬匹  
互啣交蹄戲跳躑誰歟畫此雙名駒似鬪非鬪相嬉娛  
唐人遺迹趙子摹善書善畫今代無善書突過元章米  
善畫追還伯時李先畫後書此一紙咫尺之間兼二美  
元章伯時兩人合一人媿我一詩難寫兩人真

送白廷玉常州教二首

世間可讀不多書豈但撐腸似蠹魚小技僅能攻淺近  
大言徒用騁高虛道心切戒偏忘助義事毋先計毀譽

我學暮年方見此毗陵博士比何如

詩酒論文幾歲寒更無我輩甕醲酸劇談公每掀髯笑  
偉幹人皆仰面看縱使未前乙夜席何妨暫作甲科官  
祖風雅肖香山白白玉堂登未是難

送男存心如燕二月二十五日夜走筆古體

我年三十四鄂漢脫戰場四月扁舟東生汝於建康九  
載鶴山門靜翁還鴈行實為舊主人別意殊徊徨爾時  
京湖閫開府羅才良呂氏賢父子欲我高騰驤補以

原缺  
三字

江岸司征航

歲庚申辟武節郎  
鄂州排岸不就

既而今左轄千騎

如池陽

缺左丞道山先生知池州前  
知萬州漢陽軍年三十一

攜我一家往郡齋

代表章汝姊始四歲同爾歸南堂

姊禾娘後嫁程氏  
年四十卒已五年

明

年辛酉秋浙漕鶚薦翔道山此大恩給我鶚爵郎

是舉軍功

官不放試登仕郎萬  
五千人縉十人取一

別省第一人見知梧與杭

碧梧先生馬丞

相廷鶚時以缺  
生章原缺

司主文取義杭山先  
鑑時以常丞為考官取策

不學執國柄似道

貪如狼其客福建子瑩中狼如羊厥子偶不第乃獨憾

老方讒之於似道陰幽弩機張

賈似道不學貴妃弟至  
相位其客廖瑩中不識

時文體以君親師三脚為書義故黜瑩中肆其誣巖似道謂方山武官門下人不文欲行駁放然尚云不是馬仲翔取此人廷試復第一考官文趙常文公天祥趙公日起常公挺擬

為第一似道降為乙科首易置乙科首爾豈識臭香蕭艾厭蘭蕙我

心亦不忙易方山京為第一謂越州出帝王后妃未出狀元以為上意仕宦天有命

豈由人低昂不意毒愈盛廖真嬖人倉五百彼何知四

遭白簡霜故嘗忤林杗何至嗾郭閭林杗知徽州回江東倉幹配其都吏

猶曰忤之御史郭閭廣東人廖瑩中引之言路下短卷嗾論回人皆知之曾港出師敗蟻臣

叫九蒼數其十可斬乃先竄炎荒誅之木綿庵身死國



亦亡為相亡人國自合以命償匪我快私憤人欲抽爾

腸臺諫我不就出守隣故鄉

兩除御史諫官欲擊王煥議不從出回知建德府

大物既歸周裸士來殷商夷齊與箕微均為識三綱

附歸

已無廟社之後者持塊土欲安往乎

我所領小壘可容久徜徉亦欲捨之

去羣盜紛寇攘勉強不得已艾惡完善良完國非我責

完郡亦何傷幸保千里民不為劍戟戕姦鬼伏肘腋兩

賊程與黃

親家程淳祖門生黃斯覺

門生許座主壻不顧糟糠妄告

無反坐官吏飽賄賊一朝擲笏綬僅有書幾囊辛巳至

庚子闔門饑欲僵二十年不仕愚意誰揣量苟生內自愧一思汗如漿焉得掛海席萬里窮扶桑茅屋蔭松菊  
槿籬畦芋薑讀書粗知道晦遯攀餘芳詩文亦不俗千  
篇垂琳琅今汝往筮仕已踰四十強蕭然乏行李艱甚  
謀聚糧此皆我之過棄官畏禍殃以致兒女輩無不羸  
以疋行行燕山下悠悠易水傍北風無時無南人少裘  
裳汝父近八袞汝母七旬將苟可得一職歸甘泌之洋  
生理我無策徒此歌慨慷壯士一大笑出門青天長

送方復大宣城學錄

莆田鄣郡本同宗更著深夜臭味同  
秃筆有天猶易補孤燈無地可能容  
不趨宰相翹材館寧糾諸侯泮水宮  
十載鳳池科尚在已應一舉首登龍

方氏來南漢閨時烝嘗所在富孫枝  
歛溪真應仙翁墓嚴瀨玄英處士祠  
邂逅弟兄元共祖慙慙子我總能詩  
因風不要花瓜顙梅老遺篇幸寄之

再送羅雲叔

欲共君歸未有緣春風奪我紫陽天牡丹富豔花如洛  
煮白香濃酒似燕細看貌非寒士相隨宜班亞冷官負  
人間第一好山處賦幾篇詩醉幾筵

題龍虎山高士毛和叔愚泉詩藁

暫住身如鶴在松忽然飛去又無蹤閤皂山頭曾不睡  
夜寒看月到晨鐘

宗兄端叟年七十六來訪二首

年才踰壯早相知北騎南船幾別離二老皆鄰八旬壽

一生誰賦萬篇詩，特承枉顧元無說。獲侍同行識者誰？  
流水桃花別天地。碧山許到果何時？

遼廣歸來二紀強，脫身煙瘴遠沙場。僧多吟友詩常淡，  
家見玄孫壽且康。殘月夜潮渡漁浦，飛花春雨客錢塘。  
西山後會何妨數，管趁年年早茗香。

三月八日百五節，林敬輿攜酒約盛元仁戴帥初。  
方萬里訪趙仲實宣慰於西湖第五橋之曲港南。  
山書院五首

第五橋通曲港船直搖春水到門前休官久作漁竿客  
扶老來尋鶴氅仙疇曩歡娛如昨日今吾衰颯最高年  
舊墳新塚石羊馬且舉殘杯莫愴然

湖山春色已如斯城市原來了不知百五韶華全似畫  
二三名勝總能詩忽驚我輩相攜處誰識吾人始到時  
五十四年前弱冠設盆猶憶唱闌詞

暮年無不與心違節物過從事總非何處青梅嘗煮酒  
誰家紅藥試單衣半酣便合拏舟去驟熱猶容借扇歸

忽憶向來獨立處雪天閒看白鷗飛

生長西湖死葬湖興言舟子與農夫全家衣食憑搖舫  
歷世兒孫學荷鋤布衲劣兼蓑笠有蘆湯恐併醬醯無  
金盤玉筯環歌舞午闌昏空一任渠

後生誰識舊西湖除却山僧樹總無何至梅仙墳亦掘

惟應葛嶺鬼當誅

林和靖墓楊連旃迴發之

紅裙鞭鐙追游女白首

端章笑腐儒兩盞三杯更多感不如爛醉眼模糊

送徐君奇入燕并序

吾聞游京師取富貴者必年若甘羅終軍辯若  
季子方朔貌若賀知章李太白貲若龐居士王  
參元猶患其不得志君有一於是乎笠北風之  
前昂頭長嘯棹南斗之下鼓臂疾行是特其胸  
中有過人者耳詩曰

貌寢如孫叔貲單未計然曾微方朔辯已過買臣年插  
翅能踰海乘槎可上天問君何所恃珠玉富千篇

贈筆工楊日新



黃鐘九寸裁為律六呂六律相配匹嶰谷參差十二筩  
猗管城子從此出上古蒼頡初制字後人蒙恬始造筆  
吳云不律燕云弗韻書又以律為聿曰方曰冊刀削之  
削之筆之作以述析竹蘸墨絲其端龍圖龜書就篇帙  
秋兔拔毛號毛穎愈奇愈巧愈精密脩管執之以為柄  
短管敷之以為室其實不過一毫端良工於此有神術  
鋒但欲齊忌太尖翠羽鼠鬚俱不必老夫平生學歐顏  
晚脫場屋塗注乙著書棄筆如丘山使年將及三萬日

眼花尚能寫蠅頭筆不如意輒怒叱江淮筆工千百家  
孰甲孰乙我所悉鷄距散卓楊日新不落第二亦第一

次韻謝巖養晦酒邊說易

四正為奇偶四隅舊窺七七古河圖易雖未畫元知有  
極果何形孰識無方寸天開通造化半生夜坐下工夫  
老衰多學精專少病體樞趨但要扶

送紫陽趙山長治台叟三首

昭代英髦盛文儒氣數還天明黃道日地重紫陽山斗

食三年內孤燈午夜間晦翁元不死鑽仰定睇顏

山好鄰書塾溪翁割釣磯許時為客久長是送人歸子

去青衿喜吾衰白髮稀會須桐蔭底酬唱羽觴飛

子家有犬

桐

昔年初弱冠丙午創書堂四海仰朱子萬山環紫陽工

夫誰久大邃密要商量舊日鵝湖語端能子細詳

淳祐郡守

上饒韓公補丙午創建紫陽書院於城南門外舊尉司衙桃符二句曰四海共宗朱子學萬山環繞紫陽祠佳句也兵後遷入城南門內至今無以易之而規模不及前矣

恠夢十首

三月二十五日曉夢有人擒二士生納棺中尋有長大人欲脅予以此以求金

帝謝  
無之

高枕非難就深杯未易謀可須疑噩夢久已慣窮愁老  
矣何嫌死歸歟豈願留曉梁數聲燕搔首倚吾樓

自和

個儻千金盡艱難斗酒謀有生誰不死惟醉暫無愁彭  
澤先生去周南太史留誰家錦步障還墜綠珠樓

再和

休官二十載絲髮不身謀肯顧江淹恨焉知庾信愁但  
當思反魯何必望封留閉目常危坐胸中百尺樓

三和

身謀曾不暇何況子孫謀我老宜多病癡人豈識愁管  
窺天謂小繩挽日難留將騎言何猥蒼茫下白樓

四和

勤能將拙補命輒與仇謀尚有江湖債終無世俗愁已  
衰猶未死欲去又還留萬事鵝兒酒諸公燕子樓

五和

文宗韓吏部詩學杜叅謀餘子焉能免吾徒別有愁潮  
陽寧遠謫補闕肯中留往事驚棋局餘生付酒樓

六和

子午參同契春秋類是謀生前焉用學死外別無愁豈  
料猶窮健胡為此滯留客懷誰可比王粲賦登樓

七和

三朝前穀雨寒甚過時謀夜短鷄聲早春闌燕語愁獨

行仍獨坐難去又難留粗守持身法堅城護百樓

八和

萬變觀時事誰其肉食謀乾坤一儒腐今古兩眉愁  
白首生何益青春逝不留孤燈夜夜坐曉角動軍樓

九和

昔日顓朝柄何人誤廟謀漸驚吾輩盡誰識向來愁  
忠鯁芳香在姦邪臭穢留一時窮富貴蜃氣結成樓

三月二十九夜二更杭火焚花巷壽安坊至四月

一日寅卯止

傾國傾城誇美色，千金萬金供首飾。武林城中花巷名，  
紹興年前人未識。亮死瓜洲再講和，巷名不為栽花窠。  
象珠翠玳玉筭外，紫紫紅紅裁綺羅。是時永嘉有佳士，  
歎嗟花巷名太多。繁華漸盛，古朴素謂鄉人非美事。  
誰知鵲集一朝非，婦鬟女髻彌芳菲。冠梳簪珥向曉賣，  
百偽一真無關譏。戊戌年冬十月十藝此闌闔成瓦礫，  
豈料鬱攸再作崇。庚子春殘小盡日，一十六度莫茨新。



兩見焦頭花巷人買賣假花年厚利坐此得罪於神明  
君不見九重一言軒輕易頭白紛紛無忌諱人人一朵  
牡丹春四海太平呼萬歲

次韻王起宗勉為高子明繪松巖圖

松下客攜琴巖中人讀書聲氣相應求妙寫入畫圖灑  
落真意趣冷淡閒工夫體中脫不佳明牕時自娛誰方  
策龍驤萬里籛雲衢卿自用卿法未用輕賢愚

鈇山虞華甫往謝疊山枋得君直為書耕隱二字

今年八十一其子舜臣字舜民來見嘗師君直年

四十九求賦耕隱詩

有陳鉞湯炳龍張謙  
陳應子白珽舊詩

君直不可見見此長虹吐使其尚未死年始七十五當時書此字贈我老華甫今年八十一仍卧舊處所謝公名太盛殺身甘荼苦虞公不競名躬耕隱村塢有名無名間俛仰隔今古直木先翦拜明膏自煎煮何如牛背上  
一蓑弄煙雨所以馬少游伏波非所取

桐江續集卷二十五